

Colossians Paul-ele pipe nhenhe intelhe-ileke Ngkarte-kenhe areyeke apmere Colossae-larle anemeke

¹⁻² Atyewe Jesus-kenhe areye-aye, ayenge awerriraye. Ayenge Paul-arle, Ngkarte ayenge akngakeke ilemele alhetyeke Jesus Christ-eke warrke-irretyeke arrpenhe areyeke Ayeye Mw-erre Jesus-akerte ilerle-apetyeke. Kele the an-teme ayeye nhenhe intelhe-ileme arrekantherre atyewe Jesus-kenhe areyeke apmere Colossae-le aneme. Atyengenge aneme Timothy atyewe aty-inhe. Ilerne ayeye nhenhe renhe arrekantherre intelhe-ileme. Arrantherre anwerneke-artweye aneme Christ-nge ware.

Ayenge Ngkarteke angkeme renhe apayuth-nemele arrenhantherrenhe arntarnte-aretyeke mwerre arrekantherre anetyeke arrantherre nhenge atnerre anetyenhenge, atere-kwenye.

Paul Ngkarteke angkeme itneke

³⁻⁴ Timothy ilerne Ngkarte apayuthneme, Akngeye Alartetye Jesus Christ-kenhe arrekantherre, nhenge apeke ilerne Renhe apayuth-nemele Renhe akwetethe tnakemele, ilerne-arle aweke-arle nhenge arrantherre Jesus mw-errantye apenterleng, arrantherre-arle atyewe

Jesus-kenhe areyeke ahentye anthurre anemenge. ⁵ Arrantherre Jesus Christ arratye itelareme ante Ngkarte-kenhe areyeke ahentye-anemele arrantherre-arle atnerre akarelheme arne mwerre areyeke nhenge Ngkarte-arle arrekatherre alkerenge arntarnte-areme. Arrantherre kele aweke arne mwerre areye-akerte nhenge Ngkarte-arle arrekatherre alhileke mpwaretyenhenge, nhenge tyerrtye areye apmere arrekatherre-werne apetyeke ayeye mwerre Jesus Christ-akerte iletaye, angkentye Ngkarte-kenhe arratye aneme-arle.

⁶ Apmere arrpe-anenhenge tyerrtye areyele aweme angkentye mwerre nhenhe renhe-ante Christ-akerte, aweke-arle-iperre atningkele arratye itelaremele, kele atningke-ame-atningke Jesus-kenhe atyewe areye-irreme itne lyete anteme Ngkarteke arratye-irremele anerlte-aneme. Nhenge arrantherre alakenhe arratye-ante anetyeke irremele arrantherre nhenge ayeye mwerre aweke-arle, arrantherre-arle akaltye-irreke nhenge Ngkarte mwerre anemenge ingkirrekele nhenge Jesus arratye itelaretyenhenge.

⁷ Artwe nhenge Epaphras-ele arrenhantherrenhe angkentye nhenhe akaltyele-antheke nhenge arrantherre-arle ikwere akutne anakenge. Re kwenhe atyewe mwerre anthurre ilerne-kenhe, re ilernekele-arlenge warrke aywerrkele mpwareke Christ-eke. ⁸ Re nhenhe-werne apetyeke ilernenhe ileke nthakenhe-arle Utmenge Akngeye-kenhele arrekatherrenge mpwareme nhenge arrantherre Ngkarte-kenhe ingkirrekeke ahentye anetyenhenge anthurre.

9 Ikwerenge-anteye anwerne ayeye nhenhe arrekantherre-akerte aweke-arle, anwerne Ngkarte apayuthnerlte-aneme arrenhantherrenhe akaltyele-anthetyeke arne ingkirreke-arle itelaretyeke arrantherre nhenge mpwaretyeke. Anwerne Ngkarte apayuthnetyame alakenhe renhe mpwaretyeke Utmenge Ikwerenhele nhenge arrantherre akaltye anthurre anetyenhenge ante itelaretyenhenge arne areye arratye-arratye.

10 Anwerne Ngkarte apayuthneme nhenhe renhe mpwaretyeke arrekantherre nhenge arrantherre arratye anerlte-anetyeke kele Jesus re akangkeke anthurre. Anwerne alakenhe Ngkarteke angkeme nhenge arrantherre akwetethe arne mwerre mpwaretyenhenge arrpenhe areyeke ante Ngkarte-akerte awethe-ame-awethe itelaretyenhenge.

11 Anwerne Ngkarte apayuthneme nhenge arrenhantherrenhe Utmenge Ikwerenhele atnerre-ilerle-anetyeke. Anwerne alakenhe apayuthneme nhenge arrantherre Renhe akwetethenhe awetyeke akangkemele anerlte-anemele, nhenge arrpenhe areyele arrekantherre anhelhemele atwetyeke-anteye.

12 Anwerne apayuthneme nhenge arrantherre Ngkarte anwerne-kenhe akwetethe tnaketyeke. Re kwenhe arrenhantherrenhe akngarte-iweke Ikwerenhe areye anetyeke, alakenhe ikwerenge anteme Re arrenhantherrenhe anthetyenhe iwenhe renhe-arle Re alhileke anthetyeke Ikwerenhe areye alkere akertnenge, alkngenthe Ikwerenhe arrtyernemenge.

*Jesus Christ arrpenhe ingkerrenyekenge
akngerre anthurre ulkere*

¹³ Arrule anthurre Satan anwerne ingkirrekeke pwathe anetyarte. Ikwerenge anteme anwerne ingwemertele-arteke aneke. Lyete-ulkere Ngkartele anwernenhe Satan-engentyele ipmentye impeke anwerne Alere Ikwerenhenge apurtelhe-ilemele apentetyeke iwerre mwerrele.

¹⁴ Re anwerneke piwelhemele ilweke Satan-engentyele ipmentye impeke anwerne anteme Ngkartenge ipeltye-irreke Re urrpereke arne akurne ingkirreke anthurre anwerne-arle mpwareke.

Christ Akngerrepate anwerne-kenhe aneme

¹⁵ Anwerne-arle Ngkarte aretyakenhe aneke,
Re akenhe Alere impene Ikwerenhe Jesus Christ yerneke nhenge anwerne renhe alhengke-aretyenhenge ante itelaretyenhenge Ngkarte iwenhe-arteke anemenge,
Jesus-arle Re-arteke anthurre-arle aneme.

Jesus arrwekelenye Ngkarte-kenhe,
Re ingkirrekenge atyeperre anthurre-ulkere Ngkartele-arle mpwareke.

¹⁶ Re nhenge Ngkartenge arne ingkerrenyekenge mpwaretyeke,

Re mpwareke arne ingkirreke apmere ahelhe nhenhenge-arle, alkerenge-arle.

Re mpwareke arne ingkirreke nhenge anwerne-arle aretyeke, arne ingkirreke anwerne-arle aretyakenhe aneme.

Re mpwareke pwathe ingkirreke alkerele-arle
aneme, alkere-arenye arrpenhe areye-
arlke.

Alakenhenge anteme Ngkartele Christ-nge
anpere-irrenhemele arne ingkirreke
anthurre mpwareke, nhenge ingkirrekele
Jesus tnaketyenhenge, Rarle arrpenhe
ingkirrekenge akngerre-ulkere.

17 Arne anetyakenhenge-urrke, Re kwenhe kele
aneke,

ikwerenge-ntyale anteme arne ingkirreke
mpwareke-arle iperre, ahelhe nhenhenge
uthene alkerenge uthene,

Re ahelhe uthene alkere uthene arntarnte-arerle-
aneme Utmenge Ikwerenhele akurne-
irreme-ketye.

18 Christ Akngerrepate tyatye-ke, nhenge
tyerrtye-arteke-arle, Re itnenhe ileme
nthakenhe-arle mpwaretyeke,

nhenge akaperte tyerrtyeke alartetye-arteke
renhe ileme nthakenhe mpwaretyeke.

Rarle nhenge tyerrtye Ikwerenhe areye itethe
antheme,

rarle nhenge arrwekele anthurre ilweke itethe-
irrirtneleme,

re alartetye anthurre irreke,
arrpenhe ingkirrekenge akngerre-ulkere.

19 Ngkarte-arle itirrekenge Christ-arle ahelhe
nhenhe-werne apetyeke tyerrtye-irremele,
re Ngkarte-arteke rante-rante anthurre anetyen-
henge.

²⁰ Alakenhe ikwerenge anteme Ngkartele tyerrtye ingkirreke-arlike arne ingkirreke-arlike ipeltye-ilettyeke alkerele uthene apmere ahelhe nhenhele uthene.

Re nhenhe renhe mpwareke nhenge Jesus-arle arne arntarlkweke-arlike tyerrtye ingkirrekeke ilwekenge alhwe ikwerenhe itneke thelelheke.

Lyete anteme ingkirreke mwerre anetyenhenge Ngkartenge-arle ularre.

²¹ Nhenge Jesus-kenhe areye apmere Colossae-le, urreke arrantherre Christ arratyte itelaretyenhenge, arrantherre Ngkarte-ketye akalke-akalke anetyarte, nhenge arrantherre Ikwere ahele aneke arrantherre-arle akwetethe anthurre arne akurne areye mpwaretyarte.

²² Lyete anteme, Ngkartele arrekantherenge ipeltye-irreke Alere Ikwerenhe-arle tyerrtye-irrerlengge arrekantherre piwelhemele ilweke. Nhenge arrantherre Ikwerenge arrwekele tnemele arrpenhe areyele arrenhantherrenhe uyarne ilperneme iwenhe-arle Jesus-ele mpwarekenge.

²³ Nhenge arrantherre akwetethenhe Angkentye Mwerre arratyte itelaretyeke renhe imperle-alhetyakenhele. Jesus akwetethenhe anthurre apentewarraye apurrke-irretyale. Alkerele anetyenhenge aweke-arle iperre, Renhe arratyte itelareke-arle, Jesus-ketyenge untyeme-irretyale anteme. Nhenge angkentye nhenhe ahelhe ingkirreke anthurrenge ileke-arle tyerrtye ingkirrekeke. Kele Ngkartele ayenge uterneke alhetyeke-

anteye angkentye nhenhe renhe apmere arrpe-
anenhe-werne ilerle-apetyeke.

*Paul ilelheme nthakenhe-arle re arnterre an-
thurre warrke-irreme nhenge ayeye mwerre Jesus-
akerte iletyeke Jew anetyakenhe areyeke*

²⁴ Akurne anthurre areye atyenge aneke
nhenge tharle ayeye Jesus-akerte ilerle-apekenge
tyerrtye atningkeke, kele ayenge akangkemele
aneme. Tyerrtye atningkele Jesus arraty
itelareke, tharle ayeye ikwere-akerte ilerle-
apemenge. Kenhe arrpenhe areyele, nhenge
Jesus-ketye ipmentye awekenge, atyenge
arlkarentye-irremele, ayenge atwemele, ayenge
jail-ke akwerneke. Kele mwerre-arle, itne
ayenge alakenhe mpwareme itne-arle alakenhe-
anteyele Jesus-ekamparre mpwareke. ²⁵ The
angkentye mwerre nhenhe atyewe Jesus-kenhe
areyeke ileme Ngkartele-arle ayenge ilerleng
arrenhantherrenhe akethele iletyeke ayeye
Jesus-akerte, renhe alengke-iwetyakenhele.

²⁶ Ngkartele angkentye nhenhe alengke-
iwemele atnyeneke tyerrtye ingkirreke-ketye
arrule-arle anetyarte. Kele nhenhe-ngentyele
anteme Ngkartele angkentye renhe arratelhe-
ileke akethelhe-ileke atyewe Jesus-kenhe
areyeke. ²⁷ Ngkarte kwenhe renhe alengke-
iwentye-iperrele, Ikwerenhe ingkirrekeke
akethelhe-iletynhenge, Jew anetyakenhe
areyeke apmere arrpenhe-arenye areye-inpe.
Ayeye nhenhe mwerre anthurre tyerrtye
apmere arrpe-anenhe-arenye areyele awetyeke
akangkemele anetyeke nhenge Ngkartele-arle

itnenhe mwerrentye arntarnte-areme-arlike. Angkentye nhenhe re alakenhe angkeme: “Christ kwenhe arrekantherre-arlenge aneme, alakenhe ikwerenge anteme arrantherre atnerre-ilelhemele anetyenhe nhenge urreke-arle Christ-ele-arle arrenhantherrenhe akngetyenhe mwerrentye arntarnte-aretyenhenge apmere Ngkarte-kenhenge nthenhele-arle ingkirrekele Renhe akwetethe tnakemele.”

²⁸ Alakenhe ikwerenge anteme anwerne tyerrtye ingkirrekeke ayeye Christ-akerte ilerlte-apeme nhenge itne awemele apeke Christ-eke atyewe-irretyeke renhe arratye apentewar-retyenhenge. Anwerne itnenhe alkngarre-ileme ayeye urrtiyirrentye aweme-ketye akurne anteme mpwareme-ketye. Anwerne itnenhe akaltyele-anthetyeke ahentye aneme Christ-enge apurte anetyeke nhenge itne atnerre tnetyeke Ngkartenge ularre. ²⁹ Alakenhe ikwerenge anteme ayenge akwete arnterre anthurre warrke-irreme atyewe Jesus-kenhe areyenge. Re ayenge Utmenge Ikwerenhele antheke the war-rke nhenhe renhe mpwaretyeke, ayeye mwerre nhenge ilerle-apemele.

2

¹ Ayenge arrekantherre itelaretyeke ahentye-aneme nhenge ayenge-arle arnterre warrke-irreme arrenhantherrenhe arntarnte-aretyeke atyewe Jesus-kenhe areye apmere Colossae-nge, apmere Laodicea-nge areye-arlike, atyewe Jesus-kenhe arrpenhe ingkirreke-arle ayenge akutne akwete anemeke. ² Ayenge arrekantherre

alakenhe warrke-irreme nhenge arrantherre
 utnengenge atnerre awelhetyenhenge,
 apurte mwerre anerlte-anerlenghe arntarnte-
 arerremenge. Ayenge arrekantherre warrke-
 irreme nhenge arrantherre ayeye mwerre
 Jesus-akerte akaltye-anthurre-irretyeke akethe
 anthurre renhe itelaretyenhenge. Ayeye nhenge,
 Ngkartele-arle alengke-iweke-kamperre, lyete Re
 arratelhe-ileke. ³ Christ anyentele-ante kwenhe
 arratelhe-ileme angkentye nhenge renhe
 akethelhe-ilemele ayeye alengke-iweke-arle
 renhe. Angkentye yanhe ikwerenge-ntyale ware
 anteme nhenge arrantherre awetyeke akaltye-
 anthurre-irretyenhenge angkentye Ngkarte-
 kenhe ingkirrekeke. ⁴ The nhenhe arrekantherre
 ileme nhenge arrpenhe areye arrekantherre
 urrtiyirretyakenhe angkentye apale akaltyele-
 antheme-ketye, arrenhantherrenhe uternemele
 itirretyeke itne-arle nhenge arraty akwele
 ileme. ⁵ Kele ayenge-arle apmere arlengele
 aneme arrekantherrenge, nhenge ayenge-arle
 arrekantherrenge aneme-arteke ayenge-arle
 akwetethe anthurrele arrekantherre itirrerle-
 anemeke. Ayenge arrekantherre akangkeme
 anthurre arrantherre-arle apurte anerlte-
 anemenge anyente-arteke Jesus Christ arraty
 akwete itelaremele.

*Arrantherre angkentye Ngkarte-kenhe awe-
 tyeke mpwaremele anteye iwenhe apeke renhe
 rarle arrenhantherrenhe ilemenge*

⁶⁻⁷ Arraty anthurre-arle nhenge angken-
 tye Jesus Christ-akerte aweke-arle arrantherre

renhe arratyte itelareke Alartetye arrekanttherrenhe anetyeke. Alakenhe ikwerenge anteme arranttherre Jesus-nge apurte anetyeke, untyeme-irretyale. Arne artekerre-akerte tnen-tye akngerre, alakenhe renhe Jesus-nge apurte anetyeke. Arranttherre angkentye Jesus-kenhe awetyeke akwetethe renhe mpwaremele renhe alhule-iwetyale, arranttherre atnerre anthurre anetyeke, angkentye urrtiyirrentye areye akwenpele aweme. Alakenhe renhe-arle, akwetethe mpwarewarraye iwenhe renhe itne arrenhantherrenhe arrwekele akaltyele-antheke-arle. Nhenge arranttherre Ngkarteke angkemele Renhe akwetethe tnaketyeke ingkirreke-arle Rarle arrekanttherre mpwarekenge.

⁸ Arelhewarraye! Tyerrtye arrpenhe areyele apeke arrenhantherrenhe uterneme-ketye itnenhe awetyeke apentetyeke. Itnenhe awetyale anaye, itne-arle angkerlengenge nhenge itne akaperte altywere akwele aneme-arteke nhenge arrekanttherre urrtiyirretyenhenge ware. Angkentye itnekenhe-arle arratyte anetyakenhele itne-arle aweme ayeye arrekwelenye itnekenhe-arlike aknganekarle areye-arlike ante angkemele anteme nhenge itne arratyte akwele, itne arratyte angketyakenhele angkentye arratyte Christ-akerte. Itne apale-apale ware angkeme angkentye arratyte Christ-kenhe.

⁹ Kele tyerrtye yanhe areye awetyale anaye, nhenge Christ-arle ahelhe nhenhe-werne apetyeke tyerrtye-irremele anteme, rarle Ngkarte akwete anthurre aneke. Christ-nge anerle-aneme tyerrtye ikwerenhenge.

¹⁰ Ngkarte apurte aneme anteye utnenge arrekhantherrenhege arrantherre-arle Christ-nge apurte-irrekenge. Nhenge Christ alartetye atyeperre-arle aneme alartetye arrpenhe ingkirrekenge tyeperre-ulkere, alartetye alkerele areye-arle, ahelhe nhenhe-arenye areye-arlke.

¹¹ Ye, arrantherre apurte Christ-nge aneme. Nhenge Re akngarte-iweke iwenhe ikwere-arle arrantherre ahentye aneme, arrantherre arne akurne areye mpwaretyakenhe anetyeke. Kele lyete arrantherre arne mwerre-ante ware mpwaretyeke ahentye-aneme.

¹² Itelarerrirraye, nhenge arrpenhele arrenhantherrenhe nhenge baptise-eme-ileke, arrantherre kwatye kweneke irrpemele akeme-irremele anteme. Kele nhenge kwatye kweneke irrpemele Christ-nge ilweke-arle-arteke, nhenge akeme-irremele, re akenhe apurte Christ-enge itethe-irrirtnemele-arteke. Nhenhe-arle aneke-akerte-irreme, arrantherre-arle arratyete itelarekenge Ngkartele-arle Utnenge Ikwerenhele Christ ilweke-arle iperrenge renhe itethe-ilirtneke. Re arrenhantherrenhe awethe itethe-ilirtneke alakenhe-anteye.

¹³ Kenhe arrantherre Jew anetyakenhe areye akenhe, urreke Christ arratyete itelaretyenhenge arrantherre ilweke-arle areye-arteke anetyarte. Arrantherre arne akurne areye mpwarerlte-apeme ayakelhetyakenhele. Arrantherre angkentye Moses-kenheke akutne aneke. Kenhe Ngkartele akurne urrpereke arrantherre mpwarekenge, arrekhantherrenge ipeltye-irrekarle, Re arrenhantherrenhe akemelhe-ilemele itethe alkarleke Christ-enge.

Lyete arrantherre Christ-enge itethe aneme.

¹⁴ Nhenge pipe-nge aneme intelhe-ileke-arle arne akurne ingkirreke anwerne-arle mpwareke, kenhe arne akurne yanhe areyele anwernenhe ilpernemeke. Kenhe Ngkartele akenhe urrpereke arne nhenge areye pipe-nge intelhe-ileke-arle, arne nhenge areyele anwernenhe ilperneme. Nhenge alakenhe-arteke, Ngkartele pipe ineke-arteke renhe akethe-ante arrernemele nail-ele arne arntarlkweke-arleke arrerneke nhenge Jesus ilwekenge. ¹⁵ Nhenge Christ arne arntarlkwele ilweke Ngkartele arrentye arrpe-anenhe anathe-ileke, arrentye areye ahelhe nhenhe-arenhe areye-arleke alkere-arenhe areye-arleke. Nhenge itnenhe apurele-anthetyeke, Re itnenhe ayernemele akngeke ingkirrekenge arrwekele-werne itnenhe aretyenhenge. Re tyerrtye ingkirrekeke imerneke nhenge Rarle arrentye areye anathe-ileke nhenge Christ arne arntarlkwele ilwekenge.

¹⁶ Arelhewarraye! Awerrirretyale arrpenhe areye-arle angkeme arrantherre-arle akurne akwele nhenge arrantherre-arle merne arrpenheme arlkwemenge iwenhe apeke arrpenheme antywerlenghe itne-arle arrenhantherrenhe mpwaretyale nhenge ileme.

Itne apeke angkeme arrantherre-arle akurne akwele arrawe-irrentye akngerre-arle uterne ikwerele-ureke, nhenge atnyentye akwerrke arateke apeke, arlte Apurrkele apeke. Kele itnenhe awetyale anaye itne-arle arrenhantherrenhe apale ware ilperneme nhenge itne-

arle akaperte altywere anemenge-arteke akwele. ¹⁷ Tyerrtye yanhe areye awerrirretyale anaye angkentye yanhe areye-arle arlkwentye akngerre-akerte antywentye-akerte anerlenge akweke ware, Christ-arle apetyetyakenhe akwete. Nhenge arne nhenhe areyele Christ-werne thileme, rarle arratye anthurre. Christ-ele arne ingkirreke anthurre mpwareme Ngkartele-arle alhileke, kele anwerne arne ingkweye nhenge areyeke ahentye-anetyakenhe akwete.

¹⁸ Awerrirretyale yanhe areye nhenge apale-arle arrenhantherrenhe uterneme arrkernetyeke angkemele, “Anwerne-artekele Ngkarte tnaketyeke, kwene-irraye alkere-arenye areye tnaketyeke!” Kele itnenhe awetyale anaye. Tyerrtye nhenhe areye angkeme nhenge itne-arle akwele ahirre aremele nhenhe areye-akerte. Itne irraweye anthurre irremele angkeme nhenge itne-arle akwele akaperte altywere aneme, kenhe arrangkwe-arle, itne angkeme itirrentye itnekenhengentyele ware. ¹⁹ Ye, tyerrtye yanhe areye akwenpele awerrirraye, itne-arle nhenge angkentye Christ-kenhe ipmentyele impemenge. Nhenge Christ akaperte-arteke aneme, anwerne tyerrtye Jesus-kenhe-arteke. Re anwernenhe ingkirreke anthurre akayake atnyeneme. Tyerrtye ante nhenge alwerrkngge-akerte-arlke ngkwerne-akerte-arlke, kenhe akaperte-kwenye-arle re akenhe amangketyakenhe. Kele Christ, akapertele-arteke, ikwerenhe areye lterrke atnyenerle-aneme re nhenge arratye amangketyeke, Ngkarte-arle ikwere

amangketyeke ahentye anemeke.

²⁰⁻²¹ Lyetenye arrantherre Christ akeme alartetye, arrantherre-arle ikwerenge ilweke, ikwerenge apurte-irreke anteye. Nhenge arrantherre Christ-enge ilwemele, arrantherre ipmentye impeke awetyeke iwenheke-arle tyerrtye arrpenhe areye-arlke aknganeke-arle areye itirremenge angkemenge anteye. Arrantherre itelareme nthakenhe-arle itne angkeme nhenge merne arrpenheme arlkwetyale anetyeke arne arrpenheme anpetyale anetyeke-arlke. ²²

Itnenhe awerrirretyale angkentye nhenhe areye-arle itirrentye tyerrtye-kenhe-ante ware, urreke-ulkere itne uyerretyenhe. Arrantherre akaltye aneme merne-arlke arne arrpenhe areye-arlke anemenge akweke ware. Nhenge arrantherre merne arlkwemele re uyerremenge, arne arrpenhe areye-arlke uyerremele-anteye.

²³ Tyerrtye nhenhe areye-arteke apale angkeme arrantherre-arle iwenhe apeke arrpenheme mpwaretyeke. Kenhe arrantherre apeke itnenhe aweme, arrantherre anteme akurne mpwaretyenhenge: arrantherre ingkirreke anthurre mpwaretyenhe itne-arle ileme, arrantherre anteme arraty anetyenhenge itnekenge ularre. Arrantherre angketyenhe arrantherre-arle akwele tnakelhetyakenhe aneme. Arrantherre arnterre warrke-irretyenhe apurrkele-anthemele anteme. Arrantherre merne arrpenheme-ante ware arlkwetyenhe. Kenhe arrangkwe-arle! Angkentye nhenhe areye akurne-arle! Itne-arle arrenhantherrenhe

uyarne ayakeme akurne mpwareme-ketye
arrantherre-arle mpwaretyeke ahentye aneme.

3

*Arrantherre arne areye mpwaretyeke
Ngkarteke akangketyenhenge*

¹ Ngkartele kwenhe arrenhantherrenhe ut-
nenge mwerre antheke, nhenge alakenhe-arteke
Ngkartele arrenhantherrenhe iperte-ngentye
akemelhe-ileme nhenge Rarle Christ iperte-
ngentye akemelhe-ileke. Alakenhe ikwerenge
anteme arrantherre itirretyeke arne nhenge
areyeke Ngkarte-kenheke, arne nhenge alkere-
arenye areye-arlike. Christ alkerele aneme alarte-
tye impene Ngkartenge anemele. ² Alakenhenge
anteme arrantherre akwetethe itirretyeke arne
alkere-arenye areyeke, itirretyale akwete arne
ahelhe nhenhe-arenye areyeke. ³ Itelaraye,
nhenge urreke arrantherre Ngkarte itelare-
tyenhenge, arrantherre akutne-arle anetyarte
akurne-arlike, Ngkarteke itirretyakenhe, arran-
therre anteme Ngkarte-akerte aweke akurne
nhenge ingkirreke ipmentye impeke. Arran-
therre tyerrtye ilweke-arle-artekele. Lyete an-
teme arrantherre Christ-nge-arlike itethe aneme,
Ngkartenge-arlike; Ngkarte uthene Christ uthene
arraty anthurre apurte anyente-arteke aneme.
Tyerrtye areyele uyarne itelareme utnenge mw-
erre Christ-enge arrantherre-arle atnyeneme.

⁴ Nhenge re arrenhantherrenhe itetheke mpwareke, arrantherre warrke ikwerenhe mpwaretyeke. Nhenge Jesus Christ apetyalperlenge arrantherre ikwerenge apurte-irretyenhe tyerrtye atningkenge arrekwele tnetyenhe Ikwerenge mwerre anthurre anetyenhe, alyerre anthurre-arle.

⁵ Arrantherre apeke arne ahelhe nhenhe-arenye areye mpwaretyeke ahentye aneme. Kele arne yanhe areyeke mpwaretyeke itirretyale anaye, Ngkartele-arle arrenhantherrenhe utnenge mwerre anthekenge. Akngwelye-irretyalaye, arrpenhe areyeke alhirretyale itneke atneke-atneke-irremele. Itirretyale anaye akurne akwetethe mpwaretyeke, mwerre mpwaretyeke itirrewarraye. Ankeyalthe anetyalaye. Arrantherre apeke ankeyalthe aneme arne ahelhe nhenhe-arenye areyeke kele anteme arrantherre Ngkarte-ketyenge untyeme-irremele yanhe areye-ante ware tnakeme. ⁶ The arrenhantherrenhe ileme, Ngkarte ahele-irrentye-akngerre tyerrtye areyeke Renhe awetyakenhe akurne yanhe areye mpwaremenge-ante. ⁷ Arne yanhe areye-arteke renhe arrantherre mpwarewarretyarte, nhenge arrantherre Ngkarteke itirretyakenhe awerrirretyakenhele. ⁸ Kele arrantherre arne akurne yanhe areye mpwaretyarte, lyete akenhe impelhetyeke arrantherre-arle Christ arratyte itelaremenge. Ahele-irretyale anetyeke, tyerrtye arrpenhe areyeke ahentye-anetyale anetyeke, arne akurne mpwaretyale anetyeke. Arrantherre awethe tyele angketyale

anetyeke, angkentye akengentye arrpenhe areyeke angketyale anetyeke. ⁹⁻¹⁰ Urrtyirremele ilelhetyale arrpenheke. Arrantherre arne alakenhe renhe-arteke mpwaretyale anetyeke arrantherre-arle Christ arratyte itelaremeke.

Lyetenye arrantherre akngarte-iwelheke, tyerrtye arrpenhe-irremele arratyte itirremele, akurne-ketyenge impelhetyeke. Kenhe Ngkartele akenhe utnenge arrekhantherrenhe arratyte-ileke arrantherre arratyte anerlte-anetyeke, Re arrenhantherrenhe akwetethe arratyte-ilemele, arrantherre Ikwere-arteke awethe-ame-awethe irretyenhe. Kele anteme arrantherre akaperte altywere anthurre Ikwere-akerte. ¹¹ Ngkartele-arle arrenhantherrenhe utnenge mwerre antheke. Arrantherre anyurre-irretyarte angkemele alak-enhe, “Yanhe areye Jew anetyakenhe, itne-arle artwe-irretyakenhe. Kenhe Jew yanhe areye kwenhe artwe anthurre-arle. Kenhe tyerrtye akethe-ante ipenye nhege pwetye-arenye areye-arle arne arrpe-anenheke akutne-arle. Kenhe arrpenhe yanhe areye pwatheke warrke-irreme. Kenhe arrpenhe nhenhe areye alartetyeke warrke-irretyakenhe, itne mpwareme arne iwenhe apeke ikwere itne-arle ahentye aneme.” Kele alakenhe itirretyale anaye, Christ-eke-ante itirrewarraye, rarle alartetye impene anthurre.

¹² Itelaraye arrantherre-arle Ngkartele-kenhe areye. Arrekhantherre ahentye anthurre aneke-arle, Re arrenhantherrenhe akngakemele Ikwere-artweye-arteke irretyeke. Kele arne mwerrentye-ante ware mpwarewarraye. Mwantye-mwantye-ilerretyeke anaye. Mwerran-

tye anetyeke, anhelhetyale anaye. Tnakelhetyale anaye. Mwantye angkerretyeke, irrpelthe-irretyakenhele, mwantyele awerretyeke.

¹³ Atnerte akngarte-iwelhetyale tyerrtye arrpenhe areyeke itne-arle arrenhantherrenhe arrerlkelhe-ilekenge, ipmentye renhe impaye iwenhe apeke re angketyeke nterte ware anetyeke. Nhenge arrpenhe apeke arrekantherre akenge angkerlengge ikwerenge ipeltye akwete anaye, nhenge alartetye Jesus-elarle akurne arrekantherrenhe urrperekenge arrekantherrenge ipeltye-irrerlengge. Alakenhe re-anteme arrantherre ipeltye-ilerretyeke.

¹⁴ Alakenhe-arteke anteye, kenhe atyeperre anthurre akenhe aneme arrantherre-arle mpwaretyeke, nhenge mwerrantye arntarnte-arerretyeke. Alakenhe anteme arrantherre arraty anthurre apurte-irrentye akngerre.

¹⁵ Arrantherre arlkarentye-ilerlte-anetyale anaye, kele ipeltye-ilerretyeke. Ngkartele arrenhantherrenhe apurtelhe-ileke ipeltye-ilerretyeke Christ-ele-arle mpwarekenge. Ngkartele arrenhantherrenhe akngakeke apurte anerlte-anetyeke tyerrtye Christ-arteke. Kele Ngkarte akwetethe tnaketyeke Rarle arrenhantherrenhe mwerre anthurrele arntarnte-arerlengge.

¹⁶ Akwete anthurre angkentye Jesus Christ-akerteke itirrerlte-ane. Itirrerlte-anaye arne nhenge areyeke rarle angkekengge nhenge arrantherre ayeye nhenheke arraty anthurre akaltye-irretyeke arrantherre akaltyele-anteme-antherretyeke. Kele anteme arrantherre ingkirrekele itelaretyenhenge

arratye. Alyelhetyeke alyelhentye atningke, alyelhentye Bible-nge, alyelhentye Jesus-akerte-arlike, alyelhentye impene arrpenhe areye-arlike. Akangkemele akwete alyelheme Ngkarte tnakemele.

¹⁷ Ayenge awerrirraye! Arrantherre atyewe alartetye Jesus-kenhe areye. Kele, arne arrantherre-arrpe mpwaretyale. Arrantherre angketyeke apeke mpwaretyeke apeke arne nhege areye imerneme-arle arrantherre-arle Jesus-kenhe aneme. Akwetethe Ngkarteke akangkemele anaye Renhe tnakemele Christ-ele-arle arrekatherre mpwarekenge.

Paul-ele Jesus-kenhe areye ileme nthakenhe itne anetyeke

¹⁸ Arelhe anewe-akerte areye, aywerrkele awaye nhege anewe ngkwinhe angkerlenge arrantherre-arle Jesus-kenhe anemenge. ¹⁹ Ante artwe anewe-akerte areye awerrirraye anteye, akayakele arntarnte-araye anewe ngkwinhe-arrpe itnenhe uternetyakenhe ante tyaperteye-artekele.

²⁰ Ampe areye awerrirraye, aywerrkele awaye mangkwe uthene anyangkwe uthene arrantherre-arle Jesus-kenhe anemenge. Nhege arrantherre aywerrkele awerlenge Ngkarte akangkemele aneme. ²¹ Arrantherre meye uthene akngeye uthene areye awerrirraye anteye ampe arrekatherrenhe akwetethenhe apelkele ilteme. Arrantherre apeke akwete anthurre itnenhe ilterlenge itne apatemele anteme.

22 Arrantherre warrkene areye awerrirraye! Aywerrkele mpwaraye alartetyele arrenhantherrenhe ileme mpwaretyeke. Ikwerenge arrwekele-ante ware kwenye nhenge alartetye arrenhantherrenhe aremenge akwele, nhenge re ikwerele anetyakenhe anteye. Nhenge arrantherre aywerrkele mpwarerle-anemele Alartetye Jesus-ele aretyenhenge akangkemele anetyeke. 23 Warrke arrpe-anenhe aywerrkele mpwaraye, apurrke-irretyakenhe. Nhenge arrantherre tyerrtye areyeke mpwaretyakenhe, arrantherre kwenhe Alartetye Jesus-eke mpwaremele. 24 Nhenhe itelarerrirraye. Alartetye Jesus-ele arne mwerre akngerre atnyeneme rarle arrenhantherrenhe alhileke anthetyeke. Yanhe ikwere kwenhe arrantherre-arle mpwareme, Jesus arrekantherrenhe alartetye. 25 Kenhe tyerrtye apeke akwetethenhe arne akurne areye mpwarerle-anerleng Ngkartele aremele renhe atwetyenhe rarle akwete anthurre akurne mpwaremenge. Rarle kwenhe itirretyakenhe aneme tyerrtye anyente-arle akwele arrpenhenge mwerre-ulkere. Urreke-arle, Ngkartele kwenhe tyerrtye ingkirreke Ikwerenge arrwekele ngkernetyenhe, itneke itirremele, itne apeke akurne mpwareke-arle Re anteme itnenhe atwetyenhenge.

4

1 Kenhe alartetye areye awerrirraye! Warrkene arrekantherrenhe areye arratyentye mpwaretyeke uternaye, itneke ahele angketyale,

Jesus-arle alartetye arrekantherrenhe-anteye an-erlenge alkere akertnenge, Renhe awetyeke.

Paul-ele Colossae-arenye areye apayuthneme Ngkarteke ikwere angketyeke

² Ayenge arrekantherre ingkirrekeke alakenhe angkeme: Ngkarteke akwetethenhe angkeme apurrke-irretyakenhe-arle. Nhenge arrantherre Ngkarteke angkerrirremele, mwantye arelhe-warremele, Renhe akwete tnakaye! ³⁻⁴ Nhenge arrantherre Ngkarteke angkerrirremele, atyenge apayuthnemele anteye, Ngkarteke atyenge iw-erre altywere-iletyeke the akethe-iletyenhenge angkentye alengkiwentye renhe Jesus Christ-akerte tyerrtye atningkeke nhenge itne ar-rwekele akutne. Itne ayenge jail-ke akwerneke, ayenge-arle angkentye Ikwere-akerte ware-arle angkekenge. Tyerrtye areyeke-arlike Ngkarteke angkeme nhenge itne apeke iparrpe anthurre awetyenhenge ayeye nhenhe Christ-akerteke.

⁵ Nhenge arrantherre aneme nhenge areyenge Jesus arratyte itelaretyakenhenge-arle arratyte akwete anerlte-anaye nhenge itne arrenhantherrenhe areme arrekantherre akengentye angkeketye. Nhenge arrantherre apeke arne mwerre aremele arrantherre-arle nhenge itneke iparrpe mpwaretyeke, urreke impemele. ⁶ Itnekenge mwerrentye angkerreme nhenge itne akangkemele awetyeke. Alakenhe re apeke itneke angkeme arrantherre ayeye itnekenhe awetyenhenge. Arrantherre anteme itelaretyenhe nthakenhe angkentye Jesus-kenhe

itneke arratyentye iletyeke. Kele itne aweme anthurre.

Paul-ele pipe nhenhe intelhe-ileme uyerrelhe-ilemele Jesus-kenhe areyeke apmere Colossae-arenye-arle

⁷ Nhenge Tychicus, atyeye mwerre-arle, re arrenhantherrenhe atyenge-akerte ileme, warrke ingkirreke-akerte anwerne-arle mpwareke. Re warrkene mwerre anthurre-arle, anwerne artangentye warrke mpwareme Alartetye Jesus-eke. ⁸ Alakenhe ikwerenge anteme the artwe nhenhe arrekantherre-werne yerneme nhenge re arrekantherre iletyenhenge anwerne-arle mwerre anemenge, re anteme arrenhantherrenhe angkentye Ngkarte-kenhele atnerre-iletyeke. ⁹ Atyeye arrpenhe Onesimus ikwerenge alheme. Artwe nhenhe apmere-altye-arenye arrantherre-arle aneme. Nhenge ratherre apmere arrekantherrenheke irrerle-anerremele ratherre ingkirreke-akerte iletyenhe nhenhele nthakenhe-arle-irremeke.

¹⁰ Artwe Aristarchus arritnye ilerne apurte aneme jail nhenhele, re arrekantherre akangkemele itirrerle-aneme. Mark-arlke, Barnabas-eke atyeyikwe, arrekantherre akangkemele itirreme. Ayenge arrekantherre arrwekele angkeke artwe nhenhe-akerte nhenge re apeke arrenhantherrenhe arerlenge, akangkemele renhe apmere-werne ikngwemele.

¹¹ Nhenge Joshua-inpe arrekantherre akangkemele itirreme. Arritnye arrpenhe ikwerenhe nhenge Justus. Artwe nhenhe urrpetye, Aristarchus, Mark, Joshua-arlke itne

Jew-arle atyengenge artangentyele Ngkarteke mpwaremele. Artangentyele anwerne angkentye mwerre ilerlte-apemele. Kele ayenge artwe urrpetye nhenheke akangkentye anthurre aneme.

¹² Epaphras-arlke, nhenge apmere-altye-arenye arrantherre-arle anemeke, re arrekatherre akangkemele itirremele-anteye. Re arnterre warrke mpwareme Jesus Christ-eke akwetethe anthurre Ngkarteke angkerle-aneme arrekatherre. Re Ngkarte apayuthneme arrantherre nhenge angkentye Ikwerenhe akwete anthurrele awerlte-anetyeke aywerrkele mpwaretyeke. Re Ngkarte apayuthneme arrenhantherrenhe atnerre-iletyeke lterrke-iletyeke arrantherre-arle akwetethe Renhe apenterlte-anetyeke ingkirreke mpwaretyeke Rarle ahentye-anemenge. ¹³ The itelareme artwe nhenhe-arle arrekatherre arnterre mpwaremeke Ngkarteke akwetethe angkerle-aneme arrekatherre, re Ngkarteke angkerle-aneme anteye arrpenhe areyeke Laodicea-le ante Hierapolis-ele.

¹⁴ Luke-arlke, nhenge ngangkere anwerne-kenhe aneke, Demas-arlke arrekatherre akangkemele itirrerle-anerremele.

¹⁵ Atyewe Jesus-kenhe areye-arlke apmere Laodicea-arenye anwerne-arle itneke akangkeme itirremele. Arelhe nhenge Nympha arrpenhe areye-arlke apmere ikwerenhenge apurte-irrerlte-anemeke anwerne-arle itneke-arlke akangkeme itirremele. ¹⁶ Nhenge arrantherre apurte-irreke-arle iperrele pipe

nhenhe read-eme-ileke-arle, renhe yernaye atyewe arrpenhe Jesus-kenhe areyeke apmerek Laodicea-werne nhenge itne apurte-irretyeke renhe awetyenhenge. Nhenge Laodicea-arenhe areyele pipe arrpenhe atnyeneke tharle arrwekele itneke yerneke. Pipe yanhe-arle inetyeke alhaye arrantherre ingkirrekele renhe awetyenhenge.

¹⁷ Nhenge Archippus-eke ilaye, “Warrke nhenhe akwete mpwarerle-anaye renhe uyerrelhe-ilemele, mpepeke impetyale, unte-arle Alartetye Jesus-eke warrke nhenhe mpwaremeke.”

¹⁸ Ayenge, Paul-arle, pipe nhenhe iltye atyinhele-arrpe the intelhe-ileke: AYENGE ARREKANTHERRE INGKERREKEKE ITIRRERLE-ANEME. Kele ayenge alngwirretyale, nhenge ayenge jail-le akwete anerle-anerlenge.

Ye, Ngkartele arrenhantherrenhe atnyeneme, mwantye-mwantye-ilemele anteye.

Kele alakenhe ware ayenge arrekanttherre angketyeke ahentye aneme pipe nhenhenge.

Angkentye Mwerre
Portions of the Holy Bible in the Central and Eastern
Arrente language of Australia

copyright © 2002-2014 Wycliffe Bible Translators

Language: Eastern Arrente (Arrernte, Eastern)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-05-14

PDF generated using Haiola and XeLaTeX on 11 Nov 2022 from source files dated 22 Nov 2019

26bd077a-984c-5596-a099-f37f2651f363